



COMUNU DE SOLÈMINIS

Provìntzia de sa Sardìnnia de bàsciu

Bia Crèsia 18, 09040 – Solèminis (SU – Sud Sardìnnia)
Còdixi Fiscali (CF) 80005100922 - Partida Iva (PI) 01430300929

S'AUTUTZERTIFICATZIONI

(Primu pàgina de su Giassu istituzionali de su Comunu > Serbitzius > Intrada a is Àutus)

1. Ita est s'aututzertificazioni

Est sa facultadi arreconnota a is tzitadinus de presentai, a su postu de is preguntas de is tzertificazioni comenti est acostumau a ddas fai, is stadius pròpius e is tìtulus personalis, a truessu de apòsitas decrarazioniis sotuscritas (firmadas) de s'interessau. Sa firma no depit èssiri prus cumbalidada.

S'aututzertificazioni pigat su postu de is tzertificaus fora de ddui èssiri s'abisòngiu de presentai agoa su tzertificau originali. Sa Pùbrica Aministratzioni tenit s'òbrigu de ddas arriciri, incurendi-sì de castiai e de cumprobai chi est cunforma a beridadi totu su chi nci est scritu.

Càpitat pagu bortas, arrelatendi-sì cun sa Pùbrica Aministratzioni, de ddui depi amostai is tzertificaus giai connotus de diora: pràticas po si cojai, arrelatas cun s'autoridadi de is giugis, àutus de fai lompi a logu stràngiu.

2. Decrarazioniis aututzertificadoras

Si podint "aututzertificai":

Cun decrarazioniis fatas a su postu de tzertificazioniis:

- sa dii e su logu de su nasci
- sa residèntzia
- sa tzitadinàntzia
- su pigai parti a is deretus politicus

- su stadiu tzivili (bagadiu/bagadia, cojau/cojada, fiudu/fiuda, divorziau/divortiada)
- su stadiu de famiglia
- su èssiri bius
- su nasci de is fillus
- sa morti de su maridu/mulleri, de s'ascendenti o de su discendenti
- sa posizioni cunforma a is òbrigus militaris
- s'assentadura in albus o listas asuta de sa pùbrica aministratzioni
- titulu de stùdiu o cualifica professionali tenta
- esàminis fatus
- titulu de spetzializatzioni, de abilitatzioni, de formatzioni, de novas e de cualifica tènnica
- s'arrenda e sa situatzioni econòmica, finas po anca cuntzedi calisiant beneficius e bantaxus previdius de leis spetzialis
- asciollimentu de spetzificus òbrigus cuntribuidoris cun s'inditu de su dinai currispustu
- su ddui tenni e su nùmeru de su còdixi fiscali, de sa partida IVA e de calisiat àtera cosa càpia in s'arciviu de s'anàgrafi tributària e aingìriu de s'interessau
- stadiu de farta de traballu
- su èssiri pentzionau e genia de pentzioni
- su èssiri studenti e meri de domu
- cualifica de legali arrapresentanti de personas fisicas o giurìdicas, de amparadori, de curadori e àteras cosas simbillantis
- assentadura in assòtzius o in calisiant formatzionis sotzialis
- totu su chi s'arreferit a s'asciollimentu de su serbìtziu militari
- su no tenni cundannas penalis
- totu is informatzionis, a dereta connoscèntzia de s'interessau, càpias in is registrus de stadiu tzivili.

Cun decraratzioni fatas a su postu de s'àutu de noturiedadi:

- Totu is stadius, fatus a calidadi personali chi no podint èssiri aututzertificaus ddus podit cumprobai s'interessau etou, una borta po totus, po mesu de decraratzioni fatas a su postu de s'àutu de noturiedadi. Si podint, tanti po ndi nai una, decrarai: chini funt is ereus, sa situatzioni a primitziu de fàmìllia, sa propiedadi d-unu imòbili, et s'ghendi a nai.
- Sa decraratzioni chi su decraranti fait a prou de issu etotu podit interessai finas stadius, fatus e calidadi personalis chi s'arreferint a àterus sogetus connotus beni de issu etotu.
- In sa decraratzioni fata a su postu de s'àutu de noturiedadi no nci podint capi s'expressai sa boluntadi (impènnius, renùntzias, arricimentus, procuras) e dèlegas chi amostint una procura.
- Simai abisòngit cuntrollai chi is decraratzionis currispundint a beridadi, sincasu is stadius, is fatus e is calidadis personalis decraus sa pùbrica aministratzioni ddus potzat tzertificai o acrarai, issa etotu preguntat ainturu de cuìndixi diis, de manera dereta, sa documentatzioni a s'aministratzioni chi ndi tenit cumpetèntzia.

- Capitendi diaici, po fai a lestru su protzedimentu, s'interessau podit mandai, finas po mesu de ainas informàticas o telemàticas, còpia fotostàtica, no cumbalidata, de is tzertificaus giai tentus.
- Is decraratzioni fatas a su postu de s'àutu de noturiedadi no tenint abisòngiu de cumbàlida peruna de parti de su pùbricu ufitziali candu funt in sa matessi istàntzia. Capitendi diaici, s'interessau depit presentai sa decraratzioni fata a su postu de s'àutu de noturiedadi:
 - a. acumpangendi-dda a sa còpia, no cumbalidata, d-unu documentu de arreconoscimentu (capitendi de dda mandai a curreu o a bia telemàtica);
 - b. a dda firmai ananti de su dipendenti incarrigau de dda arriciri (capitendi de dda cunsenniai de manera dereta).

3. Innui si podit imperai

S'aututzertificatzioni e is decraratzionis fatas a su postu de s'àutu de noturiedadi si podint imperai sceti in is arrelatas cun is aministratzionis pùbricas, est a nai totu is Aministratzionis de su Stadu, pinnighendi apari is institutus e is scolas de dònna òrdini e gradu, is istituzionis universitàrias, is siendas e is aministratzionis de su Stadu a ordinamentu autònumu, is Regionis, is Provìntzias, Comunas e comunidadiis montanas, I.A.C.P., càmeras de cumèrtziu e dònna àteru enti de deretu pùbricu (impari cun is entis pùbricus econòmicus).

In prus si podint imperai in is arrelatas cun is impresas a ghia de serbìtzis de pùbrica netzessidadi e de pùbricu prou (Postas, Enel, Telecom, Siendas de su Gas, et sighendi a nai).

S'aututzertificatzioni e is decraratzionis fatas a su postu de s'àutu de noturiedadi no si podint imperai in is arrelatas intra privaus o cun s'autoridadi de is giugis in su strogamentu de funtzionis giurisditzionalis.

4. Comenti funtzionat

Po si-ndi balli de s'aututzertificatzioni de manera dereta a is portalitus de is ufizius pùbricus, abisòngiat, prima de totu, a s'adoperai a cumpilai su mòdulu scìpiu, fora de ddu cumbalidai, po su chi pertocat a is decraratzionis fatas a su postu de s'àutu de tzertificatzionis (aututzertificatzionis).

Aingìriu de s'arrexoni de s'aututzertificatzioni fata a su postu de s'àutu de noturiedadi, abisòngat de sa cumbàlida de sa sotuscritzioni (firma) sceti candu no est in sa matessi istàntzia.

Sa cumbàlida de sa sotuscritzioni dda faint innantis de s'arreconoscimentu de su decraranti de parti de su pùbricu ufitziali cumbalidanti.

S'atziertamentu de chini est su de craranti dda podint fai in d-una de is maneras chi sighint:

- a. connoscèntzia dereta de parti de su pùbricu ufitziali;
- b. tistimoniàntzia de duus idòneus tistimòngius connotus de su pùbricu ufitziali;
- c. amosta d-unu bàlidu documentu de identidadi personali, acumpangiau de una fotografia, e bessiu de una pùbrica autoridadi.

5. Comenti tocat a fai sincasu de no arricimentu

Su pùbricu ufitziali o su funtzionàriu de s'ufitziu pùbricu chi no arricit s'aututzertificatzioni o sa de craratzioni fata a su postu de s'àutu de noturiedadi, mancai ddui siant is intzidus po dda arriciri, arruit in is contravintzionis de s'articulu trexentus-bintotu de su Còdixi Penali (art. 328 CP) e arriscat de ddu cundannai po no dda èssiri fata o po dennegu de àutus de ufitziu.

Su tzitadinu at a depi, po primu cosa, atzertai chini est su responsàbili de sa pràtica mandada a innantis, faendi domanda de su nòmini, sangunau e cualifica, in prus serbit a ndi sciri su nùmeru de prisia de sa pràtica etotu e sa genia de protzedimentu assenniau.

Aici comentu sa Pùbrica Aministratzioni scit cun chini est chistionendi, su tzitadinu tenit su matessi deretu de sciri chini est chi sighit su protzedimentu chi ddi riguardat e comentu lompi a is àutus arrelatus.

Bènniu a sciri is scedas, su tzitadinu at a depi preguntai, scriendiddu, su poita no est stètia arricia s'aututzertificatzioni o sa de craratzioni fata a su postu de s'àutu de noturiedadi sinnalendi finas, po connoscèntzia, su tesserinu, cun is càpidus de sa pràtica a su Comitau Provintziali de su Consillu de sa Pùbrica Aministratzioni acanta de sa Prefetura de su logu innui est stètia dennegada s'aututzertificatzioni e a sa Presidèntzia de su Consillu de is Ministrus – Dipartimentu Funtzioni Pùbrica – ROMA.

Sa pregunta depit èssiri stèrria po iscritu. Chi ainturu trinta diis de sa data de sa pregunta, su pùbricu ufitziali o chini ndi tenit s'incàrrigu no fait s'àutu e no arrispundit aingiriu de is arrexonis de su retardu/dennegu, cumentzant a lestru is intzidus po scontai in presoni finas a unu annu o po pagai una contravintzioni finas a duus milionis.

S'acabu de is trinta diis cumentzat de sa data de arricimentu de sa pregunta.

S'avanzamentu est de ufitziu, po custu no nci est abisòngiu de carelas, istàntzias o cantu àturu ancora.

Insandus a chini ant a dennegai s'aututzertificatzioni sua o sa de craratzioni suplidora, si at a agatai a podi denuntzai, simplimenti, su scariscimentu de àutus de ufitziu.

6. Sotuscritzioni, cumbàlida de sa firma e tassas de bullu

Sa lei faidora de s'aututzertificatzioni presumit chi s'aututzertificatzioni depit a èssiri sotuscrita e cumbalidada.

Cun sa bessida de su Decretu de su Presidenti de sa Repùbrica de su bintotu de Mesi de Idas Duamilla, nùmeru cuaturuxentus-corantacincu (D.P.R. 28/12/2000, n° 445), s'òbrigu de s'aututzertificatzioni de sa firma abarrat sceti po sa "decrarazioni fata a su postu de s'antu de noturiedadi", candu issa etotu no est càpia in d-una istàntzia.

Po is decrarationis fatas a su postu de aututzertificatzioni (aututzertificatzionis), abastat sceti sa sotuscritzioni de s'interessau.

S'autentitizidadi de sa firma de is decrarationis fatas a su postu de s'antu de noturiedadi, podit èssiri fata de is pùbricus ufizialis afatantis: notàrius, cancellieris, segretàrius comunalis, e funtzionàrius incarrigaus de is sindigus, finas de Comunus differentis de cussu de residèntzia, puru de su funtzionàriu cumpetenti a ndi arriciri sa documentatzioni e de su funtzionàriu incarrigau de su gestori de pùbricus serbìtzius.

Sa cumbàlida de sa firma andat asuta de tassa de bullu.

Tassa peruna de bullu depit, de àtera manera, èssiri currispusta de su tzitadinu candu abalorat chi su manìgiu de s'antu est esenti, po lei, a su pagamentu de sa tassa.

(Manìgius printzipalis giustificadoris chi sa tassa de bullu no andat pagada: su èssiri pentzionau, su èssiri fatu su sordau, su èssiri assentaus a is listas de s'ùfitziu de su traballu.

7. Decrarationis faulàncias

Castiai beni de scriri sa beridadi.

S'aministratzioni pùbrica podit avantzai de ufitziu a ndi atzertai chi siat berus su chi narat su tzitadinu.

Est cosa crara ca is normas, semprifichendi s'atzioni aministrativa, bolint puru strantaxai intra sa Pùbrica Aministratzioni e su tzitadinu arrelatas de cunfiantzosa collaboratzioni.

Su fai decrarationis faulàncias est, comentisiat, puniu cunforma a su Còdixi Penali e a is leis spetzialis.

8. Àteras dispositzionis

1) SU NASCI D-UNU FILLU

Su babu e sa mama, o mancai unu sceti, podint decrarai, aìnturu de dexi diis de su partu, su nasci de su fillu in su Comunu innui bivint, mancai siat nàsciu in d-unu àteru Comunu.

Si podit decrarai finas:

- a su Diretori Sanitàriu de su tzentru de nàscida (uspidali, clinica), àinturu de tres diis de su partu;
- a s'Ufizziali de su Stadu Tzivilì de su Comunu anca est nàsciu su pipiu, àinturu de dexi diis de su partu;
- a s'Ufizziali de su Stadu Tzivilì de su Comunu anca bivit su babu, candu tenit sa residèntzia in d-unu Comunu chi no est su pròpiu de cussu de sa mama e a patu chi sa mama nerit de eja, àinturu de dexi diis de su partu.

2) BALIDURA DE TZERTIFICAUS

Totu is tzertificaus anagràficus, is tzertificatzionis de su stadu tzivilì, is estraius e is còpias interas de is àutus de stadu tzivilì lassaus de parti de is serbìtzios demogràficus balint ses mesis de sa dii chi ddus lassant.

Est amìtiu su presentai is tzertificatzionis “scadias”, bastat chi is scedas càpias àinturus de is tzertificaus funt is pròpias.

Stanti diaici, at a abastai a ponni in su tzertificau una decraratzioni no autenticada, fata de su titulari etotu, atestendì comentì is scedas, àinturus de su tzertificau, no funt cambiadas de sa data de candu ddu ant lassau.

Dònna tzertificau fora de cambiamentus (tanti po nai: tzertificaus stòricus, de morti, titulu de stùdiu) balit po sèmpiri.

3) ESTRAIUS DE IS ÀUTUS DE STADU TZIVILI

Sa pùbrica aministratzioni no podit preguntai estraius de àutus de stadu tzivilì a su tzitadinu, perou si-nci ddus at a depi circai domandendi-ddus, de manera dereta, a s'ufizziali de stadu tzivilì cumpetenti.

4) ATZERTAMENTUS DE UFÌTZIU

Is pùbricas aministratzionis no podint preguntai a is tzitadinus su fai tzertificaus chi amostant sa mancàntzia de pretzedentis penalis o càrrigus apitzus.

Custus tzertificaus depint èssiri atzertaus, anca ddui funt is ufizzius cumpetentis, de manera dereta de s'aministradori chi depit pregonai su protzedimentu.

A una a una is aministratzionis pùbricas no podint preguntai àutus o tzertificaus aingìriu de acuntèssius, stadius o calidadis personalis, chi ndi bessint a craru de is documentus chi giai tenint o chi issas etotu depant tzertificai.

5) ARRICIMENTU DERETU DE IS TZERTIFICAUS

Chi s'interessau no bolit o no est bonu a imperai is autudecratzionis, is tzertificaus aingìriu de acuntèssius, stadius o calidadis personalis chi ndi bessint aforas de albus o de pùbricu registrus tentus o allogaus de una pùbrica aministratzioni, funt sèmpiri pigaus de ufìtziu de

parti de s'aministratzioni chi sighit su protzedimentu, apitzus de s'inditu de parti de s'interessau de sa spetzìfica aministratzioni chi allogat s'albu o su registru.

6) NO NCI BOLIT PRUS SA CUMBÀLIDA DE SA FIRMA

In is istàntzias de ponni in èssiri po is òrganus de sa pùbrica aministratzioni e is gestoris o is esertzentis de pùbricus serbitzius, no nci bolit prus s'aututzertificatzioni de sa sotuscriidura (firma), sincasu s'interessau ponit sa firma ananti de su dipendenti incarrigau de dda arriciri, o chi sa istàntzia est presentada acumpangiada de una còpia fotostàtica, mancai no cumbalidada, d-unu documentu de identidadi de su sotuscriidori. S'istàntzia e sa còpia fotostàtica de su documentu de identidadi ddus podint mandai a bia telemàtica.

Sa sotuscriidura de istàntzias no est posta asuta de cumbàlida, capitendi puru de ddui tenni decraratzionis fatas a su postu de s'àutu de noturiedadi.

7) CÒPIAS AUTÈNTICAS DE PUBRICATZIONIS

S'interessau podit sotuscriri una decraratzioni fata a su postu de s'àutu de noturiedadi anca ndi bessit a craru ca sa còpia de sa decraratzioni chi dda acumpàngiat atumbat apari a s'originali (po is pùbricus cuncursus balit su pròpiu etotu de sa còpia autèntica). Chi custa decraratzioni est fata impari cun d-una istàntzia, sa firma no est de cumbalidai.

8) DECRARATZIONIS SUPLIDORAS PRESENTADAS DE TZITADINUS STRÀNGIUS

Capitendi chi is decraratzionis suplidoras ddas presentint is tzitadinus de sa Comunità Europe, si sighit sa matessi manera de is tzitadinus italianus.

Is tzitadinus aforas de sa Comunità Europea, chi bivint in Itàlia cunforma a is cumandus de su regulamentu anagràficu de is bividoris, aprovau cun decretu de su Presidenti de sa Repùblica su trinta de maju Milli-noixentus-otantanoi, nùmeru duxentus-trintatres (D.P.R. 30/05/1989, n° 233), podint imperai is decraratzionis suplidoras sceti candu tocat a cumprobai stadius, acuntèssius e calidadis personalis chi si podint tzertificai o atestai de parti de sogetus pùbricus o privaus italianus.

9) DOCUMENTU DE IDENTIDADI A SU POSTU DE IS TZERTIFICAUS

In su mentris de s'atziertamentu de sa pregunta, est proibiu a is aministratzionis pùbricas, a is gestoris e a is esertzentis de pùbricus serbitzius, preguntai tzertificatzionis chi tistimòngiant datus o calidadis giai càpias in su documentu de identidadi.

Is scedas aingìriu de su sangunau, nòmini, logu e dii de su nasci, tzitadinàntzia, stadiu tzivili e residèntzia, atestaus in documentus de arriconnoscimentu in su mentris chi funt bàlidus, tenint su matessi balori de is currispondentis tzertificaus.

10) SU FAI CÒPIAS AUTÈNTICAS

S'autenticatzioni d-unu documentu podit èssiri fata de su funtzionàriu cumpetenti, chi at bogau s'originali, de su funtzionàriu innui s'originali est lassau o allogau, o de su funtzionàriu chi su documentu depit èssiri presentau, asinuca ancora de unu notàriu,

cancellieri, segretàriu comunali, o d-unu àteru funtzionàriu tenendi s'incàrrigu de su s'indigu.

Capitendi chi spetat a presentai a s'aministratzioni còpia autèntica d-unu documentu, sa cumbàlida de sa còpia dda depi fai su responsàbili de su protzedimentu o su dipendenti cumpetenti a ndi arriciri sa documentatzioni, faendi prima amosta de s'originali.

Stanti diaici, sa còpia autèntica podit èssiri imperada sceti in su protzedimentu currenti.

11) EST PRUS DISCANTZOSU SU PARTETZIPAI A IS CUNCURSUS

Est abolia s'autenticatzioni de sa firma po sa presentazioni de is preguntas a is cuncursus pùbricus, finas a is esàminis po ndi pigai is abilitatzionis, diplomas o titulus culturalis; in aciunta, no est prus postu in cunsideru su limidi de s'edadi, foras de calicuna borta particolari scìpia de s'una e de s'atera aministratzionis, in arrelata a sa genia de su serbìtziu.

Funt aboliu, unu infatu de s'àteru, is titulus agiudadoris in s'edadi.

Chi duus o prus candidaus, a s'acabu de is fainas de abaloramentu de is titulus e de is provas de esàmini, pigant su pròpiu puntègiu, ndi scioberant su candidau prus giòvunu.

12) CUMBÀLIDA DE SA FOTOGRAFIA

Sa fotografia podit èssiri cumbalidada deretamenti de s'ufitziu chi lassat su tzertificau, bastit chi si dda amostint ananti de s'interessau. Sa cumbàlida d-una fotu podit èssiri fata sceti candu ddu nerit a craru una norma de lei (passaportu, patenti).

13) NOAS IN CHISTIONI DE RELÀSCIU DE IS CARTAS DE IDENTIDADI E PASSAPORTU

Sa carta de identidadi podit èssiri fata a nou ses mesis innantis de scadessi.

In is documentus de arreconnoscimentu no tocat prus a inditai su stadu tzivili, foras chi no est s'interessau a ddu domandai a craru.

Is giòvunus chi abetant de fai su sordau amarolla, ant a podi otenni ora po ora su relàsciu de sa carta de identidadi e/o de su passaportu; difatis est abolia sa norma chi boliat su permissu obligatòriu a ndi podi lassai su passaportu e/o sa carta de identidadi.

14) FIRMAS DE PRUS PERSONAS IN DISPARTI

Is documentus chi bolint sa firma de prus personas, podint èssiri s'otuscritus finas in disparti e in stanti diferenti.

§§§